



半陽先生文集

自三至四

和16
657
2





華陽先生文集卷之三



長門 山根清子濯 著

男 泰德有隣 校

門人 吉田文獻子徵 輯

七言律

擬侍燕應制

未央前殿御筵開，獻壽千官劍佩迴。
北闕彤雲含五彩，南臺玉冕列三台。
賜恩謾和沛宮曲，摘藻誰稱鄴下才。
自喜宸遊陪侍從，賡歌更欲奏康哉。

過凌迤阪

書影集 卷之三
兩州形勝畫山川，百二重關一路懸。代北浮雲過龍變，周南列嶽與天連。崎嶇忽起回轅思，瞻望時歌陟岵篇。彩筆誰能題劍閣，十年客子此來還。

述懷二首

寒風落木草廬邊，歲晚窮途轉慘然。未買青山酬素志，誰將白雪寫朱絃。江間朝暮雲為雨，夢裡乾坤海化田。百載行藏唯自識，何須更著卜居篇。肺病頻年懶自如，黃金用盡結交疎。三冬文史風霜苦，一世功名日月虛。計拙敝裘門有雀，歌休長鋏食無魚。歸來江上唯高枕，寂寞獨甘楊子居。

天子登極賀聘使福原大夫竣事歸至

車馬會同朝帝畿，成周文物正巍巍。未央玉殿日新掛，太液瑞雲龍已飛。瓜瓞千秋傳大統，金符四海仰重暉。使臣原自齊高國，專對能承王命歸。

贈女道士

彩屋雲裊五色開，步虛徐唱磬聲催。豈思搗藥潛蟾窟，竟見吹簫遊鳳臺。絳節朝天路近，金冠捧日曉霞摧。昇仙知是從王母，群玉山頭長不回。

擬待漏假寐

車馬千官鬱蓋簪，禁門待漏曉蕭森。雲遮長樂鐘聲

晚火照昭陽，夜色深。豈謂鈞天叩，入夢自知魏闕永。
關心端居須，作晉臣思聖世。只今誰獻箴。

觀獵

弋獵誇胡漢，將軍鳴弓擐甲隊。兵分合圍何用開，三
面倚角祗看掩。一群搏獸鐵驄蹂，赤血射鵬金鞞劈。
青雲可知鷹犬謾，勞斃獲畧總歸指示勲。

臨池竹

脩竹團欒遶作林，疎篁密篠鬱陰陰。碧波龍動葛陂
影，爽籟鳳吟嶰谷音。千畝雲從池上起，萬竿色向水
中深。梁賓在昔爭裁賦，更憶風流帝子心。

題大隱齋

煙霞小宇郭東隅，水石卜幽三徑紆。傲世獨能淹歲
月，避名何必住江湖。醉中春色花開落，夢裡清風蝶
有無。君自仙人誰不信，白雲珠樹似蓬壺。

擬觀樂應制

象箭南籥起樓前，趙瑟秦箏逸響傳。觀樂何須遊上
國，含恩還想夢鈞天。鳴來雙鳳栖阿閣，影遏五雲繞
御筵。自是聖朝比虞代，薰風嫋嫋和朱絃。

禁門松雪

白雪青標擁帝宸，清輝靄靄禁門晨。月殘仙鶴曝毛

羽風動玉龍，摧甲鱗。千歲枝封姑射色，一時花洩上林春。蓬萊宮外高相對，更憶三山珠樹新。

老馬

黃沙百戰自縱橫，少壯曾稱騏驎名。祇有敝帷酬舊德，誰能束帛贖餘生。防秋費盡十年力，伏櫪飛騰千里情。逸氣老來猶未歇，蕭蕭更向北風鳴。

贈避穀者

曾伴赤松道，既通飄然歸。去穀城中清羸將，不勝雲褐輕。步應須御冷風，碧洞霞飛春寂寞。金莖露降夜玲瓏，他時賣藥人間住。知是世稱千歲公。

擬禁中法會應制

佛坐高臨鵝鷺群，御床近接玉爐薰。千秋日月須彌色，五彩樓臺方丈雲。講法雨花空際現，和絃清梵夜深聞。應身原自無量壽，真果方知奉聖君。

禹廟

會稽山上白雲丘，帝駕南巡此地留。海內功名疏四瀆，人間竹帛照千秋。梅梁雨閣龍蛇鬪，石室煙飛日月幽。廟裡珮環空閃爍，至今猶憶會諸侯。

壽田大人八十二首

肥遯懸車此十年，世家耆舊本翩翩。三朝遭遇二疏

意一代風流四皓賢不啻蒼松榮雪裡更看玉樹植
 階前高堂燕喜會英彥獻酒爭開壽頌篇
 覽揆佳辰高燕開如雲賓客此追陪彩星應是老人
 掛青鳥遙從王母來壽獻南山裁入頌尊傾北海醉
 登臺自今君假鶴龜筭結實蟠桃知幾回

送倉先生之崎陽

匹馬都門海色愁送君江上月如鉤青蜓西去白雲
 盡赤馬東來紫氣流驛路煙花春滿眼關山風雨曉
 回頭詞臣今日最承寵何似陵陽抱壁遊公有足病故及之
 壽永田翁七十

守藏歲月托生涯。鮫背蒼顏眉壽加。一代功名嘗授
 簡。三朝遭遇未懸車。芝蘭不啻階庭色。桃李多看門
 下華。那用著書長避世。耆英日集醉流霞。翁在史局其門故全篇及之

歲暮書懷

歲月蹉跎客計非。窮途幾度羨翻飛。山陰雪色故人
 阻。江上梅花驛使稀。垂帛千秋思驥尾。抱書此日泣
 牛衣。馬卿未向臨邛去。無那倦遊事已違。

贈邊將

登壇開府玉門關。吹角軍營晝却閒。萬里風生馳騁

裡千兵雲碎，指麾間曾誇鹿塞百餘戰。自誓麟閣第一班，聞說威名加漠北。天驕不敢度陰山。

泛江送客

八月星槎作壯遊，海門近接絳河流。銜盃天地故人少，送客江湖夕日愁。大壑陰雲迷萬里，孤城寒色倚三秋。離群握手悲搖落，碣石霜飛鴻雁浮。

早度山關

千峯迢遞白雲程，一路秋風曙色晴。登隴青山當馬出，度關紫氣傍人生。回頭時聽遠雞唱，揚策忽看宿鳥驚。萬里徒然勞跋涉，唯今誰似棄繻情。

洛中晴月

乾坤倚月帝王州，白露淒其山壑幽。夜色層臺人若玉，晴暉九陌練將流。笙歌雲斷五侯宅，鴻雁霜飛萬戶秋。此夕西風吹不盡，仲宣賦就獨登樓。

漢高廟

提劍英雄草昧秋，指麾海內運良籌。百年天地見龍躍，千古丘陵悲鹿遊。人去帝都秦樹老，時移霸業渭川流。荒祠松柏大風起，雲色蒼茫斜日愁。

贈文輔二首

尺素雲山風雨昏，回首鴻雁滿乾坤。江城梅發故人

意關月夢迷。羈客竟歎世。中原歌倚劍。論文北海醉。
開尊賦成遊。宦君何倦。曾是平臺承主恩。
盃酒城門春色深。天涯鴻雁故人心。風塵未下徐穉。
榻寥落誰憐。蘇子金滄海。明珠元照乘。西山白雪獨。
憑琴中原文字吾曹在。更不向君稱陸沈。

鶴臺春望

都門花滿夕陽明。睥睨登高意氣生。大海浮雲開百。
粵三山寒影落孤城。銜盃金谷來春色。吹笛玉江生。
晚晴長嘯仗天一長劍。雄風千里楚臣情。

輓河先生

罷官夙歲賦歸田。卜築煙霞江上天。一代文章君已。
逝百年事業夢相牽。秋風空掛迎徐榻。明月誰乘訪。
戴船長臥青山終不起。人間遺草白雲篇。

東山寄僧了覺

枯木長藤佛日幽。空王臺殿白雲丘。照心江上千峯。
雪濯足門前萬里流。說法山深梵音動。脩禪夜靜月。
明浮由來彭澤耽詩酒。爲許遠公蓮社遊。

弔喪母人

風雨倚廬江上天。白楊蕭瑟淚潛然。北堂衰服百年。
哭南海訃書千里傳。落日堪悲桑梓色。門人應廢蓼。

我篇生芻一束遙相弔居喪誰如郭泰賢

送入蕃使

一彈長劍氣如虹五馬翩翩向朔風持節那愁胡地
遠浮槎遙識漢流通關山明月動旗上沙塞黃雲擁
幕中首宿葡萄入京日初看博望建邊功

井玉李集賦東郊眺望得回字

東山叢樹鬱崔嵬落日平郊四望開城上陰雲歸大
壑江頭殘雨過層臺避名玩世漁樵客遊屐登高詞
賦才何者春風能取醉長歌處處采薇回

送僧

客路彌天彈指開青山流水暫徘徊祇林明月照揮
塵竺海長風送渡盃花雨時隨金鐸落香雲常傍衲
衣迴橐中貝葉幾千卷知是西來傳道才

白馬

貝葉西來已幾年吳門素練至今傳夜馳紫陌月明
動曉度藍關雪色鮮乘爾遼東曾拉虜誦君漢闕每
朝天銀鞍玉勒相暉映公子春驕京洛邊

擬洞庭湖作

天濶洞庭湖上秋雲煙縹渺夕陽愁地兼七澤東南
坼水合三湘西北流明月夜悲帝女瑟長風曉送仙

人舟尋源誰是凌空去幾度奮飛思壯遊

觀妓樂

越女樓頭翡翠裙繁絃急管畫紛紛照筵花柳情新
媚度曲風流酒半醺玉貌春寒姑射雪霓裳影動巫
山雲羅敷謾奏採桑調不識向他何使君

十六夜

明月西風海上樓望前望後競清遊晴暉千里度連
夜高會諸賢期幾秋賦就廣陵潮未減酒酣采石興
獨幽從今雅宴知難再沈醉何須問曉籌

擬姑蘓懷古

吳王臺上管絃秋西子盃中日月流廢苑荆生禽夜
宿荒城人去鹿朝遊百年天地短春夢萬里風雲多
客愁屬鏤由來深冤恨昏濤暮起浙江頭

畫馬

逸氣騰驤冀北群金鞍玉勒五花紋四蹄櫪下風霜
起數隊壁間雲錦分曾向龍池飛霹靂將臨狐塞拂
塵氛雄姿須是慎銜轡躡齧長嘶入夜聞

春日過津子山莊賡示韻

遲日園林鳥不譁杜門高枕擁煙霞千秋情傲高陽
客五柳春深彭澤家置酒風流謾投轄罷官天地此

華陽集 卷之三 六
懸車主人自聽羊欣過醉去何妨踏落花

送周南先生之東都三首

尊酒城門夕日殘。乘春匹馬指長安。掛帆滄海月中過。攬轡芙蓉雪裡看。澤國浮雲登隴盡。中原紫氣出關寒。回頭風雨三千里。仗劍重歌蜀道難。

東方千騎擁驂駟。書記翩翩居上頭。梁苑風流曾授簡。武昌睥睨更登樓。乘槎明月李膺去。載筆名山太史遊。到日琵琶君自見。煙波何者有扁舟。

承寵詞臣彩筆新。那能滑稽坐沈淪。壯心時別夷門酒。駿骨今看燕市春。百代文章獨宗漢。中原風雨竟

歸秦。護園久掛徐穉榻。東道由來有主人。

賀孚禪師法幢山上座

法幢山上倚崔巍。僧臘脩禪坐翠微。獅座高懸居士室。驪珠長照祖師衣。彌天明月自來去。四海浮雲無是非。遙憶春風祇樹色。拈花應與雨花飛。

管公德見邀同遊弘誓寺

宮堯古剎白雲邊。蒼海西環落檻前。峯轉上方懸一路。地幽下界隔諸天。笑談日夕徐揮麈。詩賦風流暫設筵。爲是陶公知惠遠。虎溪間月共相憐。

東廬山

東廬淨域倚崔嵬。虛谷迢迢鐘磬哀。碧草山中祇樹
苑。白雲丘上梵王臺。禪關俗遠諸天靜。佛日峯高一
路開。原自靈區何易到。抽簪誰者此徘徊。

管相公廟

一代功名振翰林。宗臣遺像萬方欽。左遷自解楚囚
恨。東望遙懸魏闕心。摘藻中原爭日月。離群西海奈
商參。餘芳千載長無盡。廟外梅花春色深。

古戰場

酣戰何年塞外城。霜飛蓬斷白砂平。垂天雲駐旌旗
影。滿野風驚鼙鼓聲。殺氣秋高禽不下。鬼燐雨暗夜

還明。漢兵秦卒偕枯骨。立馬愴然感慨生。

海

百川東注海流開。積水滔滔動地來。潮湧龍宮涵日
月。天晴蜃氣現樓臺。梁賓賦就觀濤興。漢客槎浮奉
使才。聞說求仙從此路。五雲縹渺接蓬萊。

輓徂徠先生二首

側身東望倚蒼穹。梁木歌悲道此窮。黯澹將迷上國
色。指揮未定西京風。芙蓉白雪盡天半。滄海明珠藏
月中。無奈人間竟長夜。太玄千載屬楊雄。

東海風雲天地陰。漢家文物日蕭森。三春忽灑識韓

淚百載徒懷御李心海上黃金多誤事郢中白雪失知音生芻萬里飛騰甚江畔招魂悲楚吟

呈朝鮮柳醉雪二首

翩翩使節向東方千騎如雲照路傍脩聘初觀周禮樂執圭遠到漢賢良關山花落春將盡滄海月明波不揚更喜右文昭代化尋盟百載會衣裳

箕邦詞客本豪雄才氣如虹凌上穹擊汰三春臨大海汎舟萬里馭長風蓬壺近指彩雲裡賜谷行看紅日東王事寧言勞跋涉懸弧功業遠遊中

呈朝鮮李濟菴二首

為唱皇華寵送優詞臣奉使自風流乘春文旂出鶯谷破浪錦帆過馬州寧減尋河博望興還同觀樂延陵遊泱泱何者表東海唯有芙蓉白雪浮貴國長谷驛一稱鶯谷

仙藉曾聞列上班泛槎飄忽到人間絳旗曉出紫霞洞瑞氣宵明赤馬關珠樹三花迎客發盤桃大實為誰攀東行更有天台在偏恐劉郎去不還貴國開城府松岳山

下有紫霞洞高麗侍中茶洪哲構堂于此製紫霞洞曲蓋托仙人來壽之詞○此邦洛東有獻嶽一號天山

失鶴

仙禽豈是久樊籠。雞鶩由來群不同。天遠蓬壺鳴且去。月明華表望來空。白雲影斷九臯曉。碧落翼成千里風。遺響于今留雅操。相思度曲玉琴中。

歲暮感懷

為客風霜短景催。窮愁此日暫銜盃。雪晴溪上誰迴棹。春近江南須問梅。歸計蹉跎驚季歲。微官偃蹇醉高臺。百年天地擁青袖。還耻三餘董子才。

十六夜不見月

蕭瑟風雲寒素秋。城頭雨色接江流。百年歡樂每難遇。一夕眺臨還作愁。烏鵲影迷三匝樹。管絃曲廢萬

家樓人間變態多如此。昨夜清遊不可求。

仲秋釋菜賦雙頭蓮獻聖壇

城上祥雲擁碧泉。南池花發並頭蓮。一枝風動香稍別。雙蒂波清壁自連。華嶽神仙未嘗識。漢家姊妹共相憐。由來此物比君子。看取聖朝多士賢。

答田子恭春日見懷二首

東都作

詩賦平生寒舊盟。登高日望長門城。離群共泣東西路。同病相憐彼此情。大海波瀾觀世態。三春花柳怨風聲。天邊只有芙蓉色。白雪千秋照漢京。十年薄宦敝貂裘。華髮有誰憐。倦遊春色久違金谷。

酒秋風更憶玉江舟。旅亭花落鳥驚意。故國書傳雁
破愁。老懶近來何所賦。望鄉空倚武昌樓。

仲秋釋菜賦日照萬方獻 聖壇

仙馭轉輪西陸長。蒼龍並駕赤烏翔。扶桑曉拂三山
色。積水晴浮四海光。紫氣高圍懸碧落。彤彤雲近映
華堂。昇平正識同君德。仰見秋陽臨萬方。

日者堅田子席上觀浪華富人杉文成所著詩
若干篇。近體悉具。可謂辭藻亦富也。嘗聞之帝
畿豪富之家。素封擬萬戶侯。而極南面之樂。華
靡驕奢。無不爲已。乃其俗也。文成妙齡好學志

尚超然。獨自踈濯淖污泥之中。他日所成爭光
于日月。亦不可知矣。在昔陶氏成功之後。能保
其身。卓王孫壻司馬長卿。雖偕著其富乎。然而
未聞於其身親以文學顯者也。不佞甚喜之。因
和其高樓避暑之韻。遙有此寄。

浪華城畔有高臺。百尺臨江爽氣來。漢水遙從銀漢
落。海潮更捲碧波回。門前流惹山陰艇。坐上賓稱河
朔盃。原是主人工郢調。歌成白雪興奇哉。

壽老大夫桂君八十

覽揆佳辰開盛筵。侑觴共唱萬斯年。兩朝寵遇三爲

相百歲功名數避賢。却笑投竿臨渭月。偏憐載妓泛湖船。飄然寧向滄洲去。自是延齡稱地仙。

送山縣子重祇役于京師

輕裘肥馬旅裝新。奉命重過洛水濱。揮淚不堪離別切。承恩何厭往來頻。懸弧志遂青雲士。伏櫪歌悲白髮人。到日倘逢親友問。鶯花猶對世間春。
余齡過古稀未許致仕

賡國伯華示韻

人間日月似流波。江上春回奈老何。枯木北巖迎暖晚。芳叢南苑着花多。彩毫忽動染霞色。黃鳥時依鼓

瑟歌。伏枕任他為賊謗。百年生事夢中過。

送栗文仲從侯駕之東都

東行一別幾時還。萬里促裝西海灣。分手春風金谷酒。回頭殘月玉江山。長程從駕夜過驛。千騎鳴鑣曉度關。到日試看蓮嶽上。君家白雪共難攀。

題飛梅

靈種名園鄰帝宸。飛來一夜照江濱。芳流西海萬人賞。歌入東風千載新。夢斷羅浮空對月。驛遙庾嶺漫勞春。會稽禹廟

後生枝葉

華陽先生文集卷之三 終

[Faint bleed-through text from the reverse side of the page]

華陽先生文集卷之四

長門 山根清子 濯 著

男主人 泰德有隣 校

門人 吉田文獻子 徵 輯

五言絕句

春雨

花前常欲早開後也思遲春雨原無意人心自有時

聽曉鶯

黃鳥鳴何處曉牕簾戶隔起求夢裡聲月落梅花白

蕨溪泉

獨往採薇蕨長歌到水源時時來洗耳清冽未曾渾
黃鳥鹿場雲

出岫未為雨朝昏觸石生不看麋鹿跡唯聽入山聲

景沒樹陰生野童驅犢下崎嶇時顧回山月上雲罅

阿川君上野山莊嘯風館十五景

白雪峰

千仞崔嵬立雪華銜日寒主人耽楚調簾外對相看

明月池

明月浮池上澄波涵碧空還疑銀漢路應自此中通

陶丘

華髮陶丘翁醜顏如渥赭不知轉鈞上有意為天下

零壇

神在山之阿松杉擁靈宇峯頭膚寸雲或覩崇朝雨

松檜亭

昔遊松檜地松檜遶亭多剪伐人誰忍須裁蔽芾歌

觀音閣

孤閣憑虛聳翠微一路懸應能到絕頂呼吸通諸天

漱玉泉

餘酣漱玉罷溪風吹伏枕不須洗耳來豈其使牛飲

卷之四

清暑瀑

飛瀑落山巔，岩岩摧為雪。忽被天風飄，掃却人間熱。

鹿眠場

獨往山中客，息機馴野禽。同群自相得，共睡白雲深。

虎踞巖

層石臨庭階，怪象虎踞似。夜夜嘯風聲，知傍山館起。

崎嶇阪

一路分雲陟，巉巖紆且盤。來還縱相苦，何似人間難。

采芳畹

春畹雨初霽，煙霞白日閒。誰家紅袖女，采采衆芳還。

怡曠臺

天濶浮雲盡，海平斜日微。秋風一帆掛，應是向吳歸。

植杖隴

植杖鋤青蘚，引泉灌白雲。何能知帝力，擊壤假微醺。

車輪門

公子能愛客，置酒日盤餐。車轄已投井，片輪不得還。

蘭花贈三戶氏

幽叢人不知，侵雨小葩披。同臭君相許，折來贈一枝。

七言絕句

寄東都故人三首

突兀芙蓉天際懸。浮雲不斷海東邊。誰知白雪峰端色。總入佳人度曲傳。

昨夜塞天鴻雁哀。忽看千里寄書來。綈袍戀戀好相問。誰是當今范叔才。

妙齡君自棄繻才。上國遊成氣壯哉。無限白雲函嶺色。持歸一贈故人來。

送栗子迪之京四首

分手尊前歎索居。悠悠別路水雲虛。客中一值秋風

起。應想小松江上魚。菽城有小松江

東望廣陵千里開。滔滔海水接天回。此行應有觀濤

興。君自梁賓作賦才。廣島或曰廣陵

送別秋風江水波。翻飛南北白雲多。孤舟明月赤津

夜。想汝懸帆愁裡過。明石一曰赤津

維嶽天台洛水東。逢迎玉女藥珠宮。風流君自多仙

骨。祇恐采芝行此中。

早春東故人

病來幾載對青春。白髮蕭條映雪新。高卧東山君有意。從今須作采薇人。

春宮怨

深院禽啼白日斜。珠簾不捲鎖煙霞。春風應解君王

意偏入西宮吹落花

秋宮怨

白露淒風長信秋。玉階夜永斗西流。耻將紈扇對明月。曾照君王同輦遊。

宮詞

陪燕昭陽夜臥遲。日高粧閣翠帷垂。春風未寤海棠睡。阿監傳呼強畫眉。

銅雀妓

餘妓銅臺經幾秋。君恩漳水共東流。絃歌只有當時曲。散入西陵風雨愁。

出塞

漢軍十萬擁貔貅。上將登壇瀚海秋。落日轅門金鼓起。奮身共說取封侯。

凱旋歌

將軍雄略破戎秋。征戰氛消兵馬休。飲至策勳誰不醉。酒酣傳酌月支頭。

春日行

美酒千鍾金屈卮。春風日日過胡姬。不妨呼作高陽客。倒載醉歌白接羅。

井子集二首

清談高會晉時風。美酒尊前興不空。賓客醉來俱青
眼。相携好是過阿戎。

一曲清江遶屋寒。碧波歛艷撼欄干。吾曹自有巢由
思。相遇總為潁水看。

折楊柳

送別河邊楊柳枝。年年攀折不堪悲。誰能裁得行人
怨。故向春風笛裡吹。

贈沼玄珉喪父

今春歸省親奉咳笑

一出郭門何處歸。秋雲蕭索傍人飛。憐君今日衰
麻色。不似春風斑爛衣。

贈津太雅喪父

津君居近鶴臺故用鳴鶴在陰其子和之意

古木高秋日。夜催江雲慘澹使人哀。鶴鳴何處竟難
和。聲斷西風明月臺。

哭田秀才

春末以疾歸終為永訣

昔日翩翩翰墨場。妙年才氣結交長。那知春色河梁
淚。并向秋風灑白楊。

聞甯策

調高秋色滿離亭。遷客安堪月裡聽。一夜塞鴻鳴不
度。曉風吹落雨淋鈴。

夏日集賦彈琴

自抱瑶琴弄雅絃。人間此調有誰憐。寫來白雪為君奏。寒色淒其六月天。

分題弘法精舍六景賦西城花

都門春色鬪繁華。大道霞飛車馬斜。城上東風花若雨。絃歌晝起五侯家。

贈徹禪師自京還

成道西回飛錫過。青山依舊自嵯峨。知君秋色千峯遍。借問白雲何處多。

送僧之石州

金錫天邊萬里飛。石關迢遞夕陽微。山中無限白雲

色。片片照來瓔珞衣。

戲贈人

珊瑚為枕錦為衾。翠帳香浮燭影深。原自相如能度曲。瑤琴彈作鳳凰吟。

赤關賓館呈朝鮮朴矩軒

赤馬關頭海色高。廣陵東去好觀濤。壯游此處與何淺。七發還教枚叔勞。

同前再和韻

海雲飛盡暮天高。玄菟西連千里濤。春謝江頭鴻雁少。鄉懷入夢幾回勞。

同前呈李濟菴

一路三千大海空。懸帆縹渺馭長風。行行不駐知何處。看盡扶桑日出東。

同前再和韻

渺渺蒼波涵碧空。客舟暫泊石尤風。結驩誰似故人酒。解纜明朝又向東。

同前呈李海臯

西風滄海霽吹烟。萬里長流清不漣。奉使休歌難路曲。祥雲護送木蘭船。

秋閨怨

昨夜嚴霜塞上飛。幾群鴻雁向南歸。閨中不耐淒其色。少婦終宵獨搗衣。

宮怨二首

城上河斜更已闌。女牛獨捲玉簾看。舞衣長占昭陽月。無那西宮一夜寒。

羊車終是不回鑾。金井梧桐白露寒。三十六宮明月夜。班姬獨倚玉欄干。

王昭君墓

蛾眉宛轉委胡塵。羶帳風寒愁殺人。塚上千年青草色。至今猶帶漢宮春。

長安客舍送徹禪師還西灞

面壁功成飛錫催西來達磨復西回何妨客路風波惡萬里滄溟一葦開

長安送人

攜手河邊縮柳條春風匹馬曉蕭蕭他時相憶送君處月落長安第五橋

送僧之北越

振衣千里忽離群飛錫天邊一路分明日秋風滄海北白雲片片去隨君

昭君怨二首得人字

遠嫁幾回青海春紅顏零落傍胡塵祇今何似漢宮日初信畫圖不誤人

玉顏昔日漢宮春蓬髮只今胡地塵無那君恩如覆手何能偏怨畫圖人

採蓮女

珠翠羅裙映水寒蘭橈輕盪傍江干越姬自愛紅顏色采采荷花相比看

秋宮怨

明月沈沈夜漏長秋光如水透羅裳自甘紈扇篋中棄何事淒風還斷腸

閨情

良人幾載戍沙城。復見秋風木葉驚。腸斷擣衣砧上月。不知能照伏波營。

陌上贈美人

章臺楊柳鬱如烟。陌上綺羅春可憐。君自僊人何得見。祇今誰賦洛神篇。

江口夜泊

日落風平江水平。水頭烟消萬頃碧。波流堪憐一夜隣。鷺鷥舟泊蒹葭明月洲。

塞上詞

投筆頻年事遠戎。班生未得建邊功。西征萬里歸何日。愁殺隴頭水向東。

偶作

敝廬三畝傍江干。日日青山相對看。自任門前車馬絕。蕭條高枕白雲寒。

還家迎春

十載宦遊南北人。還家此日歲華新。煙霞高映斑衣色。共醉椒花盃裡春。

少年行

金羈玉勒擁春風。繫馬章臺楊柳中。酣燕日高歌未

竟揚鞭又向五陵東

贈罷官人

致仕風塵抽玉簪，青山高臥白雲深。避名未向吳門去，梅福當年何處尋。

新年作

迎歲僑居鶴水邊，渡頭梅柳照江鮮。著來却慙舊縫掖，客裡春風十九年。

春思

江城花落子規啼，碧樹如煙望轉迷。腸斷雨中芳草色，王孫不返日萋萋。

午睡

淨簟明牕暑色空，偃然高臥領涼風。功名那向人間覓，百載榮枯一夢中。

夏日遊山泉

清泉百尺白雲寒，石罅涓涓遶翠巒。避暑此遊堪洗耳，傍人應作許由看。

山中流泉

百尺寒泉懸薜蘿，潺湲遙下白雲阿。誰知一出山中去，流到人間波浪多。

偶作寄故人

歸去來知度幾春南牕寄傲北山巾滿堂風雨一尊酒青眼何時對故人

送客

渡頭輕雨草萋萋馬躑躅夕日低客路千山蒼樹裡知君愁聽子規啼

老子

青牛昔日度關門西望于今紫氣存知是猶龍終化去人間空駐五千言

中秋泮宮集得河字

海城明月照山河此夕高樓載酒過授簡翩翩人若

玉秋光偏傍雅遊多

陪絃誦公子飲坂氏二首

干旄子子駐江濱馬若遊龍從似雲為是主人能饗客故歌既醉共醺醺

竹樹蓬蒿似野居自誇吏隱勢交疎還知仲蔚避名拙日見門前公子車

聽雨

浙瀝雨聲過竹林閒牕眠覺思沈沈夜闌更入西江急添得水痕幾尺深

賀奈大夏五十二首

高堂春燕醉流霞青鳥來巢簾外花上壽人間今且半僊符况是屬君家

君家子姪本多賢裁頌春催覽揆筵憐見芝蘭階砌色碧桃花發映新年

留別邸中故人癸酉年從東觀以儉政故減侍臣予將罷歸故有此作而不果行

余髮種種秋色新客遊幾載海東濱明朝歸去值搖落多恐人看作逐臣

送人之東都二首

陌上春風花作塵行裝映日彩霞新回頭東道三千

里何處逢迎無主人

離歌一曲別庭闌落日孤城黃鳥飛無那河邊楊柳色春風送客自依依

送人之京

滄海東連路渺漫碧波掩映白雲端翩翩自似龍門客懸帆遙過百八灘適京海路有播州百八灘故比龍門

韓信

龍韜虎略擁風雲壇上指麾百萬軍可惜弓藏歎已晚漢家不獨薄元勳

登浮圖

九層湧出聳蒼穹。天半俯聽下界風。到此世塵渾謝絕。自疑身是住虛空。

冬夜月

酒力侵寒強上樓。梅園月白夜方幽。千山積雪晴暉映。應有剡溪乘興舟。

贈念經僧

青山寂寞白雲飛。鐘磬溪深掩竹扉。牀上貝多幾千卷。夜更明月照僧衣。

上海亭

把盃睥睨倚高秋。木葉蕭條大海流。萬里白雲飛不

盡。長風吹送季鷹舟。

春雨

春雨冥冥江上天。茅廬晝鎖自蕭然。推牕試向平湖望。十里柳堤圍翠煙。

擬夏夜宿直

劍冠夜直侍皇闈。閭闔闔月懸星漢微。露降金莖曉將近。液池涼氣襲朝衣。

對雪

梁園置酒興方闌。多士如雲授簡看。獨向草廬高枕臥。只今誰亦問袁安。

東都櫻田郎春睡藤子攜早梅來且有詩予即時和答賡韻二首

可憐江上一枝春攜去清香滿袖新持贈何能勞驛使風流總是屬騷人

早梅十月海東春花發幾枝雪裡新未識啼鶯能出谷遷喬先見宦遊人頃聞藤子宦于富山侯故言及之

長井子扈從東觀過濃關賦和歌抵東邸而後遷除其事酷類源賴政世傳永言之道通神良有以哉然而彼有意而作之此無求而發余有感之因賦詩贈焉

載筆關山幾度過曲中白雪對嵯峨重遊此路春風日丘竒迎君氣色多

春曉聞角

吹角轅門聲斷腸關山雁避曉淒涼征人倚月戍樓上春半如秋夜有霜

棄婦

鳳凰度曲挑琴心相和相歌歲月深何識愛憎與顏變向君唱斷白頭吟

放猿

放汝雲山還舊棲已江湘水路何迷後來能解離群

怨莫向征人月下啼

秋江喚渡

野航水漲暮江濱。獨立秋風喚幾巡。原是東西南北客。不妨人見作迷津。

奉賀邦君嗣統

雄藩割據鎮江頭。禮樂彬彬周列侯。請見舊邦新受命。二南風化自豳州。

江樓晚眺

岸畔高樓日色低。江天縹渺望將迷。扁舟何者滄浪客。一曲漁歌長水西。

岸花

春風桃發曲溪濱。兩岸煙霞相對新。花影縱迷津口路。扁舟好似武陵人。

夏日遊山寺

雙樹蒼蒼遶佛堂。雲深山色自淒涼。法林何有人間熱。一路清風到上方。

林泉

林巒遶屋鬱崢嶸。中有寒泉百尺清。曾比潁川拂衣地。歸來好是濯塵纓。

壽香川先生七十二首 代人

城上天台飛彩霞。朝暉相映壽筵花。滿堂客醉多春色。人道紅顏仙子家。

烟花三月洛陽城。開宴者英堂上迎。此會昇平知可少。笙歌時聽鳳凰鳴。

蘭花贈栗文仲

秋風吹臭撲欄干。花發階庭朝露寒。原是同心耐持贈。知君不作艾蕭看。

和秦士熊寄贈之韻答之

蕭條講席未低帷。老去離群多所思。朗月清風絃誦夕。知君鼓瑟復何時。
士熊在館中業彈箏箏者舊瑟遺音故及之

鸚鵡

翠羽翩翩語可聞。籠中歲月怨離群。向人未告故山思。矯首遙憐隴上雲。

聞雁

北風吹雁夜沈沈。旅館寒燈客思深。何事長安書不到。聲聲鳴送故園心。

節後菊

黃菊秋高霜露寒。龍山節後幾枝殘。不妨今日少人賞。彭澤先生辭職看。

寄樹下禪僧

跌坐安禪日月長。清風不斷樹蒼涼。此心常與白雲
適。遮莫青苔侵石牀。

萍初生

晴江水解細莖浮。飄蕩隨波片片流。越女春情從此
永相携。采采下汀洲。

秋風

蕭瑟園林木葉驚。塞鴻飛盡白雲輕。可憐此日漢宮
裡。團扇歌成不耐情。

送梅岸西堂之京二首

莫道津梁跋涉多。帝鄉東望白雲過。渡孟萬里自無

恙。一路秋風蒼海波。

妙年頓悟道將成。飄忽出山飛錫輕。何啻明珠衣裡
色。香雲五彩遍身生。時聞轉衣故及之

送長俊卿之東都遷官之後始從侯駕故前二
章及之末篇述昔遊之情也

千騎從行居上頭。春風東過帝王州。據鞍試覩芙蓉
色。白雪天晴映錦裘。

函山千仞白雲橫。幾度東遊叱馭行。車馬關門高紫
氣。祇今何問棄繻生。

一十年前湯島秋。相攜詩賦醉高樓。重來如舉黃花

酒爲憶風流昔日遊

送人

十載交遊情不空。春風分手各西東。莫言別後少雙
鯉。江上潮波日夜通。

芙蓉峯下作贈田士恭

兀突芙蓉滄海灣。晴看白雪掛雲端。今來試唱故人
曲。颯爾天邊相映寒。

中秋會長俊卿宅賦庭上月呈主人

明月高樓碧水干。相逢置酒罄交歡。憐君今夜家庭
興。不似秋風東海看。

送木玄周護北客赴崎陽三首

一群漂客旅裝齊。局促凭鞍向鎮西。北客那知南海
美。珠璣滿眼使人迷。
赤馬關高碧海晴。春風花發幾行程。彩毫裁得煙霞
色。到處山川總勝情。
年年賈舶載寶來。夷夏之交西海隈。君自平生稱國
手。此行知值異人回。

季秋遊靈椿山二首

遊屐山頭秋色深。青松影落白雲岑。向來勿厭緇流
混。致仕明年將脫簪。

棲鴉飛盡夕陽收江岸丹楓白露浮歸路任他向昏
黑人間稀見上方遊清談不覺移歸路將暮故未篇及之

海東諸州水溢隄壞黎庶難食列國奉教脩

之我藩使益田大夫督衆莅焉倉君以國手故

特命從之因裁四絕句送別

洲岐南圻未安流浮汎關山風雨愁聞說防河春已

徧東方千騎下濃州

藩國濟濟才士多乘春千隊向東過揮毫爛燦煙霞

色知汝頓裁瓠子歌

遠遊羨汝帝州東妙歲徵賢名不空壯志豈祇探禹

穴經過幾處越人功

烝徒十萬決河邊舉甬興雲功未竣君去試看爲版

築何人更似傅巖賢

周南越氏塾再興余奉命來定學規奈大夏有

送別五首次韻酬之

海上雄都鎮一方學開才俊有輝光絃歌原自先王

化誰道武城是小鄉

指揮一世孰登壇周漢風騷復古難七十老翁尚童

習幾篇書策向牕攤

搖落秋風暮色悲老來那有再遊期絳帷堂上講書

罷遺愛深欽塾外碑

塾庭中有越先生石碑

五十年前遊泮宮歸來更問故鄉風人間何事歎炊

黍老後生涯長夢中

交遊幾載共相隨幽澗風流人不窺今日還鄉亡故

舊更疑逢著覩仙棊

秋夜會故人

周南作

少小離家問路津栖栖幾載苦風塵相逢何厭永秋

夜老大還鄉稀故人

中秋集秋里氏宅

明月高樓湖水邊盛筵延客酒如泉興酣潦倒不知

老卻笑酡顏似少年

中秋作

明月秋風人倚樓玉江金谷客乘舟醉來老子興何

淺一任清輝照白頭

七月七日應命探題七夕硯

和歌題

授簡佳期陪畫堂墨池波動晚風涼何人更鑿支機

石染翰能成雲漢章

應命探題海村烟

和歌題

海波萬頃曉氤氳兩岸人家望不分知是漁翁放舟

去滄浪一曲櫓聲聞

十五夜應命探題月前風

和歌題

風清月白弄秋晴。丹桂香飄零露輕。假使微雲能點綴。天涯吹拂自光明。

早春應命同賦鶯有歡聲

和歌題

雪盡梅園淑氣生。遷鶯出谷弄朝晴。春聲宛轉歡何限。更向萬年枝上鳴。

賀秋里氏五十

無疆景福樂清時。上壽耄登春日遲。門外蒼松棲白鶴。階前玉樹轉黃鸝。

能美子春集。余有寒疾不可風。闕陪悵然賦一

絕句贈之。兼呈席上諸君子。主人客歲新構小亭。故及之。

小亭結構畫圖新。簾外花飛未作塵。酷憾仙遊嫌俗骨。不看壺裡別天春。

題柳梅棣三章送宮木子東行。子姊浦野氏宦右相國鷹公後宮。數歲此行途過京師。而將見焉。生平友于之情。優于人。故末篇及之。

揚柳青青灞水流。橋頭攜手暫遲留。春風何用縮枝去。老大不期歸國秋。

舊都梅發照江濱。白日紅霞相映新。寄語故人阪君

子。慙。勤。好。贈。一。枝。春。

子友阪大連留
守于浪華邸

三月長安春萬家。天街十二簇煙霞。上林假使誇嘉卉。萼韜孰如常棣花。

送中村玄與歸鄉東都

萬里同遊東海濱。秋來豈耐別離新。武昌樓上月明夜。更惜風流少一人。

故鄉梅

天遠江南驛使疎。故園春色近何如。分明一夜羅浮興。夢覺西窗孤月虛。

華陽先生文集卷之四終

